



Komunikadu Imprensa
01 Marsu 2021
Parlamentu Nasionál

Governu tenke haforsa liu tan medida prevensaun no kombatê virus Covid-19 liuhusi penaliza sidadaun ne'ebé tama-sai ilegál iha fronteira

Pandemia Covid-19 nu'udar ameasa boot tebes ba iha ezisténsia umanidade iha sékulu 21 nian. Desde moras ne'e mosu iha Wuhan, Xina iha Marsu 2020 to'o data ida ne'e, tuir dadus *online* atualizadu husi “*worldometers*” rejista ona kazu pozitivu liuhusi ema billiaun 1.14 no ema ne'ebé mate liuhusi tokon 2.5 resin¹.

Virus ne'e tuir “*worldometers*” afeta kuaze nasaun ho teritóriu hamutuk 219 iha mundu, inklui Timor-Leste ne'ebé tama iha lista númeru 202 husi nasaun no teritóriu 221 ho kazu pozitivu iha data ida ne'e hamutuk 113. Timor-Leste tama mós iha kategoria risku aas tanba fahe fronteira terrestre ho nasaun viziñu Indonézia ne'ebé númeru kazu pozitivu no transmisaun sa'e maka'as kada loron. Indonézia tama iha lista númeru 18 ho total kazu pozitivu iha data ida ne'e hamutuk ema tokon 1.3 resin no ema mate hamutuk rihun 36 resin.

Timor-Leste nia situaun sai perigu liu tan iha momentu ida ne'e tanba iha ona transmisaun lokal husi viziñu Indonézia liuhusi fronteira terrestre ka rai-maran, partikularmente iha Munisípiu Covalima. Munisípiu fronteira sira seluk hanesan Bobonaro no Oekusi tama iha kategoria risku aas, maibé seidauk deteta kazu pozitivu ruma. Transmisaun lokal ne'e akontense tanba iha movimentu tama-sai ilegál iha fronteira terrestre.

“JSMP haree no hanoin katak atu bele haforsa liu tan medida sira prevensaun no kombatê Covid-19, Governu tenke penaliza sidadaun sira tantu nasional no internasional ne'ebé tama-sai ilegál iha liña fronteira sira entre Timor-Leste no Indonézia. Aktu la kumpri ka halo tuir dispozisaun legál sira ne'ebé autoridade públuku sira hasai, hanesan lei, dekretu lei no rezolusaun sira ne'ebé relevante ba Covid-19 konsidera nu'udar krime desobediénsia ne'ebé prevee iha alinea a) pontu 1) Artigu 244 Kódigu Penál ho pena prizaun to'o tinan 3 ka multa no bainhira nia lei kualifika aktu ne'e hanesan desobediénsia kualifikada, bele hetan pena prizaun entre tinan 1 to'o 4”, dehan Diretora Ezekutiva JSMP, Ana Paula Marçal.

Dispozisaun legál sira ne'e restrinje ka suspende tiha direitu fundamentál sira balun sidadaun nian hodi prevene transmisaun Covid-19, partikularmente liberdade sirkulasaun hanesan prevee iha Artigu 4 Dekretu Prezidente Repúblika Nú. 29/2020, Artigu 4 Dekretu Prezidente Repúblika

¹ Detallu husi dadus worldometers bele haree iha ne'e: <https://www.worldometers.info/coronavirus/>



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Nú. 35/2020 no Dekretu Prezidente sira seluk kona-ba deklarasaun EE inklui Rezolusaun sira Prezidente Repúblika nian hodi halo deklarasaun EE no Dekretu Governu Nú. 3/2020 kona-ba medida sira hodi ezekuta EE.

Iha parte seluk, sé sidadaun ne'ebé komete krime dezobidiénsia ne'e halo mós atividade negósiu exportasaun no importasaun ilegál, sidadaun ne'e konsidera komete tan ona krime kontra bandu ne'ebé prevee iha Artigu 316 Kódigu Penál kona-ba krime kontrabandu.

Virus ida nu'udar ameasa boot ida ba defeza no seguransa Estadu-nasaun nian iha setór hothotu, alende setór saúde, ameasa mós ba setór edukasaun, ekonómia, komérsiu, industria, sosiál no kulturál. Nune'e, nesesitya esforsu ne'ebé estraordinária husi parte hothotu nian hodi bele kontribui ba prevene no kombate virus ida ne'e.

Nune'e, JSMP hanoin, aleinde penaliza aktu sidadaun sira ne'ebé tama-sai ilegál iha fronteira hodi transmite ka hadaet Covid-19 iha Timor-Leste, Governu mós tenke reforsa tan forsa patroliamentu iha liña fronteira tantu internasionál entre Indonézia no Timor-Leste, patroliá mós iha liña fronteira nasional entre munisípiu sira, liuliu munisípiu ne'ebé afeta hanesan Covalima hodi prevene virus ne'e lalele haklekar tan ba munisípiu sira seluk. Atu reforsa tan patroliamentu ne'e, Governu liuhusi Komandu Militar mobiliza no koloka tan Força Defeza F-FDTL ba iha munisípiu tolu iha fronteira, hanesan Covalima, Bobonaro no Oekusi.

Iha parte seluk, JSMP apresia aas tebes esforsu Estadu Timor-Leste nian hodi kria medida polítika no legál sira relevante sira atu hodi prevene no kombate virus Covid-19, nune'e mós asegura sustentabilidade moris familiar liuhusi Dekretu Governu Nú. 12/2020 kona-ba regulamenta fundu Covid-19 no Dekretu Governu Nú. 15/2020 kona-ba apoiu osan ba agregadu familiar iha âmbito Covid-19 no Dekretu Governu Nú. 16/2020 ne'ebé altera ho Dekretu Governu Nú. 28/2020 kona-ba apoiu empregu iha âmbito Covid-19 no dekretu relevante sira seluk. Aleinde ne'e, Governu mós kria polítika hodi halo rekuperasaun ekonómika husi impaktu Covid-19.

JSMP mós rekomenda atu Governu bele aselera prosesu vasinasaun, nune'e, alende hasa'e imunidade sidadaun sira nian hasoru Covid-19, bele mós hasai restrisaun ba direitu fundamentál sira hanesan liberdade reuniaun, manifestasaun no sirkulasaun.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP